

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Enplegua, Gizarte Inklusioa eta Berdintasuna Sustatzeko Saila**

Bizkaiko Foru Aldundiaren 27/2018 FORU DEKRETUA, martxoaren 6koa. Honen bidez, Behargintza enplegu eta tokiko garapenerako zentroentzako diru-laguntzak arautzen dituzten oinarriak eta deialdia ezartzen dira; diru-laguntza horien xedea da 2018ko ekitaldian Bizkaiko eskualdeetan enplegu-politikak eta tokiko garapena artikulatzea.

I

Dekretu honen helburua da Bizkaiko Foru Aldundiaren eta Behargintza enplegu eta tokiko garapenerako zentroyen arteko lankidetzaren indartzea tokiko garapenaren eta enpleguaren arloan, erakunde bien arteko ahalmenak aprobetxatzea, eta lurraldearen ahalmen endogenoa aprobetxatzen duten neurrien bidez enplegu-aukera berriak detektatzea.

II

Enplegua, Gizarte Inklusioa eta Berdintasuna Sustatzeko Sailaren egitura organikoan onesten duen Bizkaiko Foru Aldundiaren urtarrilaren 26ko 6/2016 Foru Dekretuaren arabera, sail honen helburua da Bizkaiko gizartearen berdintasuna, elkartzasuna, gizarte-kohesioa eta enplegua bultzatzeko politika publikoak sortu eta sustatzea, eta, horretarako, zerbitzuak ematen dizkie egoera pertsonalaren, sozialaren edo familia-egoeraren ondorioz bizimodu duin eta betea garatzeko zailtasunak dituzten pertsonen. Zeregin horretan, arreta berezia jartzen du tratatu txarren biktima diren emakumeen kolektiboan eta gizarte-bazterketako egoeran edo egoera horretan geratzeko arriskuan dauden pertsonen kolektiboan. Enplegua, Gizarte Inklusioa eta Berdintasuna Sustatzeko Sailak, orobat, enplegua eta herritarren lan-gaitasunak sustatzen ditu, eta giza garapen iraunkorra bultzatzen, generoaren, dibertsitatearen kudeaketaren eta lankidetzaren zein garapenaren arloko politiken bidez.

Behargintzak udal zentroak dira, eta helburu hauetarako sortu dira: udalaren edo eskualdearen garapen integrala sustatzea, pertsonen enplegarritasuna hobetzeko ekintzak egitea, udaleko edo eskualdeko enpresa- eta merkataritza-sarea sustatzeko ekintzak egitea, enpleguari buruzko azterlanak eta informazio-jarduerak egitea, inoren konturako laneratzea sustatzea, autoenplegua bultzatzea, enpresen sorrera sustatzea, udalean edo eskualdean instalatutako enpresei zerbitzuak ematea eta tokiko garapena hobetzen duen beste edozein jardueraren egitea.

Enpleguaren tokiko kudeaketa eta tokiko garapena hurbil dauden tokiko egituren bidez egitea formula egokia da enplegua sustatu, sortu eta hobetzean emaitza onak lortzeko, eskualdeko aukera ekonomikoak aprobetxatzen baitira.

III

Enplegua, Gizarte Inklusioa eta Berdintasuna Sustatzeko Sailak, besteak beste, emakumeen eta gizonen berdintasuna sustatu nahi du Bizkaiko Lurralde Historikoan, eta berdintasunaren arloko foru-politika bultzatu. Horregatik, foru dekretu honetan jasotzen diren jarduerak genero-ikuspegia jaso beharko dute beren garapenean, eta bat etorri beharko dute Sailak berdintasunaren arloan dituen ildo estrategikoekin, alegia: zeharkakotasuna, ahalduntzea eta balioen aldaketa, kontziliazioa eta erantzukidetasuna, indarkeria matxista errotik erazteko konpromiso gisa.



IV

Foru dekretu honek bete egiten ditu erregulazio onaren printzipioak, zeinak Administrazio Publikoen Administrazio Prozedura Erkidearen urriaren 1eko 39/2015 Legean aurreikusten diren eta Bizkaiko Foru Aldundiaren urtarrilaren 17ko 2/2017 Foru Dekretuaren 3. artikuluan jasotzen diren (dekretu horren bidez, Bizkaiko Foru Aldundian xedapen orokorrak egiteko prozedura arautzen da).

Bizkaiko Foru Aldundiaren urtarrilaren 17ko 2/2017 Foru Dekretuaren 14. artikulua xedatutakoarekin bat, honako txostenak egin dira:

1. Proiektua sustatu duen sailak egindako txosten juridikoa.
2. Genero- eraginaren ebaluazioari buruzko txostena.
3. Kontrol ekonomikoaren txostena.
4. Legezketasunari buruzko txostena

V

Xedapen hau onartzeko eskumenari dagokionez, Bizkaiko Lurralde Historikoko Foru Erakundeen Hautapen, Antolaketa, Araubide eta Jardunbideari buruzko otsailaren 13ko 3/1987 Foru Arauaren 17.1.4 eta 17.2 artikuluen arabera, Bizkaiko Foru Aldundiaren Gobernu Kontseilua da organo eskuduna.

Hori dela bide, Enplegua, Gizarte Inklusioa eta Berdintasuna Sustatzeko Saileko foru-diputatuaren ekimenez, eta aurrez Bizkaiko Foru Aldundiak 2018ko martxoaren 6eko bileran aztertutik, honako hau.

XEDATZEN DUT:

1. artikulua. — Xedea

Dekretu honen xedea da Behargintzak enplegu eta tokiko garapenerako zentroentzako diru-laguntzak arautzea; diru-laguntza horien bidez, Bizkaiko eskualdeetan enplegu-politikak eta tokiko garapena artikulatu nahi dira.

2. artikulua. — Erakunde onuradunak

Bizkaiko Lurralde Historikoko udal edo eskualdeetako Behargintzak enplegu eta tokiko garapenerako zentroak izan daitezke dekretu honetan ezarritako laguntzen onuradun.

Dekretu honen ondorioetarako, hauek izango dira Behargintzak enplegu eta tokiko garapenerako zentroak:

- «Bermeoko udala-behargintza»: Bermeo, Mundaka eta Sukarrieta
- «Erandioko udala»: Erandio.
- «Ermuko udala»: Ermua eta Mallabia.
- «Galdakaoko udala»: Galdakao.
- «Gernika-Lumoko lanbide-ekimenak zentroa». Gernika Lumo, Arratzu, Ea, Busturia, Errigoiti, Muxika, Gaategiz-Arteaga, Mendata, Morga, Ibarrangelu, Forua, Murueta, Nabarniz, Ajangiz, Elantxobe, Ereño eta Kortezubi.
- «Getxoko udala»: Getxo.
- «Leioako udala»: Leioa
- «Portugaleteko udala»: Portugalete
- «Santurtziko udala»: Santurtzi.
- «Sestaoko udala»: Sestao.
- «Basauri-Etxebarri Behargintza, S.L.» Basauri-Etxebarri: Basauri eta Etxebarri.
- «Behargintza Txorierri, S.L.»: Loiu, Lezama, Larrabetzu, Sondika, Zamudio, Derio.
- «Bilbao Ekintza, Enpresa Erakunde Publikoa»: Bilbo
- «Enkarteru, Enkarterrietako Turismo Elkarte»: Gueñes, Galdames, Alonsotegi, Gordexola, Balmaseda, Sopuerta.



- «Inguralde, Barakaldoren Gizarte-Ekonomia Garapenerako Erakunde Autonomoa»: Barakaldo.
- «Lea Artibaiko Garapen Agentzia, SA»: Berriatua, Etxebarria, Ispaster, Markina-Xemein, Lekeitio, Ondarroa.
- «Durangoko Merinaldearen Mankomunazgoko Behargintza»: Abadiño, Atxondo, Durango, Elorrio, Garai, Iurreta, Izurtza, Mañaria eta Zaldibar.
- «Meatzaldeko Behargintza, S.L.» Meatzaldea: Muskiz, Abanto eta Zierbena, Zierbena, Ortuella eta Trapagaran.
- «Mungialdeko Behargintza S.L.»: Arrieta, Bakio, Fruiz, Gamiz-Fika, Gatika, Laukiz, Maruri-Jatabe, Meñaka eta Mungia.
- «Urduñaderra Urduña Ederra S.L.»: Urduña.
- «Uribekostako Behargintza S.L.»: Barrika, Berango, Gorliz, Lemoiz, Plentzia, Sopela, Urduliz.

Onuradunak izateko, entitateak ezin dira egon Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Arauaren 12. artikuluko debekuetako batean ere sartuta.

3. artikulua. — Diru-laguntza jaso dezaketen ekintzak.

1. Behargintzek 2018ko urtarrilaren 1etik abenduaren 31ra bitartean egiten dituzten tokiko edo eskualdeko jarduera-proiektuak lagundu daitezke diruz.
2. Behargintzen tokiko edo eskualdeko jarduera-proiektuak bat etorriko dira Enplegua, Gizarte Inklusioa eta Berdintasuna Sustatzeko Sailaren jardun-lerroekin.
3. Tokiko enplegua hobetzeko tokiko edo eskualdeko jarduera-proiektuak lagundu dira diruz, baldin eta jarduera hauetako bat egiteko badira:
 - a) Pertsonen enplegarritasuna hobetzea; arreta berezia jarriko da talde hauetan: emakumeak, gazteak, 45 urtetik gorako pertsonak, iraupen luzeko langabetuak eta baztertua geratzeko arriskuan daudenak.
 - b) Enplegua sustatzea mendetasuna duten pertsonentzako arreta soziosanitarioaren sektorean.
 - c) Enplegu berdea sustatzea. Dekretu honen ondorioetarako, jarduera edo sektore ekonomiko hauetan sortutakoa izango da enplegu berdea: energia berriztagarriak, garraio, eraikuntza eta birgaitze iraunkorra, bioerregaien sorrera, nekazaritza eta abeltzaintza ekologikoa, turismo iraunkorra, hondakinen eta hondakin-uren kudeaketa eta tratamendua, eta baso-eremuen kudeaketa.
 - d) Udaleko edo eskualdeko enpresa- eta merkataritza-sarea sustatzea, bai eta gizarte-ekonomiako enpresak ezartzeko jarduerak ere.
 - e) Laneratze-enpresak sustatzea.
 - f) Udalean edo eskualdean instalatutako enpresei laguntzea eta zerbitzuak eskaintzea, batez ere industria, merkataritza eta turismoaren arloetan.
 - g) Gizarte eta laneko berrikuntzaren arloan proiektu estrategikoen barruko jarduerak egitea, batez ere gizarte-bazterketako egoeran dauden pertsonentzat.
4. Enplegu eta toki garapenerako zentroek eskura dituzten baliabide guztiak jarri beharko dituzte proiektuetan gizonezko eta emakumezkoen arteko ordezkartza orekatua egon dadin.

4. artikulua. — Laguntzen zenbatekoa eta muga

Diru-laguntzak funts galdurako izango dira, eta zenbatekoak ezin izango du inoiz ere gainditu diru-laguntza jasotzeko aurkeztutako ekintzen benetako kostua.

Diru-laguntzaren zenbatekoa kalkulatzeko, kontuan hartuko da proiektuan aurrez ikusitako gastu eta sarreraren aurrekontua, eta norgehiagoka sistema erabiliko da, 6. Artikuluan ezarritako balorazio-irizpideak oinarri hartuta.



Erakunde eskatzaile bakoitzari aurkeztu dituen ekintza guztiengatik gehienez 50.000 euroko diru-laguntza emango zaio.

5. artikulua. — Diruz lagundu daitezkeen gastuak

Gastu hauek bakarrik jaso dezakete diru-laguntza: udaleko edo eskualdeko proiektuetan zuzenean diharduten Behargintza zentroetako langileen soldata, ordainsariak eta gizarte-segurantzaren gastuak.

Erakunde onuradunak egiten dituen barneko gastuak soldaten eta karga sozialen ordainketa egiaztatzen duten agirien bidez baino ezin dira justifikatu.

Dekretu honetan jasotako diru-laguntzen xede diren jardueretan debekatuta dago azpikontratazioa egitea.

Diruz lagundutako jardueren azterketa eta ebaluazioa edozein unetan egin daitezke, jarduera hasten denetik, eta jarduera amaitu eta gero ere egin daiteke. Erakunde onuradunak lankidetzan jardun beharko du Enplegua, Gizarte Inklusioa eta Berdintasuna Sustatzeko Sailarekin, eskatzen zaizkion datuak eta agiriak aurkeztu beharko ditu.

6. artikulua. — Diru-laguntzak emateko prozedura eta balorazio-irizpideak.

1. Eskabideak norgehiagoka araubidearen eta hainbanaketaren bidez adjudikatuko dira, 13. artikuluan xedatutakoarekin bat.

2. Aurkeztutako eskabideak baloratu eta diru-laguntzaren zenbatekoa zehazteko, irizpide hauek hartuko dira kontuan:

- a) Aurkeztutako proiektuaren definizio-maila, kalitatea, edukia eta aurkezpena, bai eta proiektuak entitate eskatzailearen helburu, lerro eta ekintzekin duen koherentzia ere. Gehienez, 2 puntu.

Irizpide hori baloratzeko, erakunde eskatzaileak txosten bat aurkeztu beharko du eta, bertan, gutxienez honako hauek jaso beharko ditu:

- 1) Proiektuaren memoria, alderdi hauek zehazten dituena:
- Lortu nahi diren helburuak
 - Egin beharreko jarduketak; atal honetan, zehatz-mehatz azalduko da jarduketa bakoitza, eta adieraziko da zein epetan egingo den eta nor ardurtuko den egiteaz
 - Proiektuan parte hartzen duten pertsonen zerrenda
 - Jarduera bakoitzeko aurrez ikusitako pertsonal-gastuak, aurrez ikusitako sarrerekin batera.
- 2) Proposatutako ekintzaren egokitasuna justifikatzeko arrazoiak.
- 3) Behargintzaren jardun-eremua diren udalerrietan proposatutako proiektuaren lan- eta gizarte-eraginaren azterketa.
- b) Behargintza zentro bakoitzak hartzen dituen udalerrietako biztanleak, guztira. Irizpide hau kalkulatzeko, kontuan hartuko da 2017ko urtarrilaren 1ean Bizkaiko udalerrietan zeuden biztanleen kopurua.
- 30.000 pertsonaraino: puntu 1.
 - 30.000 pertsonatik 60.000 pertsonara: 2 puntu.
 - 60.000 pertsona baino gehiago: 3 puntu.
- c) Behargintza zentroak hartzen dituen udalerrien kopurua:
- Udalerri 1: puntu 1.
 - 2-5 udalerri: 2 puntu.
 - 5 udalerri baino gehiago: 3 puntu.



- d) Behargintza zentroaren jardun-eremuan erregistratutako langabezia-tasa. Irizpide horren kalkulua egiteko, kontuan hartuko da udalerrriak 2017ko abenduan erregistratutako langabezia-tasa (iturria: Lanbide - Euskal Enplegu Zerbitzua).
 - %10eko langabezia-tasa edo txikiagoa: 0 puntu.
 - %10etik %13ra arteko langabezia-tasa: puntu 1.
 - %13tik %16a arteko langabezia-tasa: 2 puntu.
 - %16ko langabezia-tasa edo handiagoa: 3 puntu.
- 3. Berdinketa gertatzen bada, ordena lehentasun-irizpide hauen arabera erabakiko da:
 - a) Artikulu honetako 4. irizpidean puntuaziorik handiena lortu dutenak.
 - b) Artikulu honetako 3. irizpidean puntuaziorik handiena lortu dutenak.
 - c) Eskabideak Bizkaiko Foru Aldundiko sarrera-erregistroan eskabideak izan duen hurrenkera.

7. artikulua. — Diru-laguntza ordaintzea

- 1. Emandako laguntza epe hauetan ordainduko da:
 - a) Diru-laguntza ematen den unean, gehienez diru-laguntzaren %50 ordainduko da.
 - b) Geratzen den ehunekoa, 2018ko urrian, 8. artikuluan zehazten diren justifikazio-agiriak 2018ko irailean aurkeztu ondoren.
- 2. Justifikazioari buruzko agiriak 8. artikuluan zehaztutako epearen barruan aurkeztu ez badira, 21. artikuluan xedatutako prozedura irekiko da.
- 3. Betebeharra aitortu eta diru-laguntza ordaindu aurretik, erakunde onuradunek zerga-betebeharrak nahiz zuzenbide publikoko gainerakoak eta, hala badagokio, Gizarte Segurantzarekikoak ere bete dituztela egiaztatuko da.

Egindako egiaztapenaren bidez ikusten bada entitate onuradunak ez dituela egunean zerga-betebeharrak eta Gizarte Segurantzarekikoak, orduan 21. eta 22. artikuluetan ez-betetzeetarako ezarri den prozedura hasiko da, eta ohartaraziko zaio eman zitzaion laguntzaren zenbatekoa kobratzeko eskubidea galduko duela, eta emaniko kopurua doitu egin beharko zaiola.

8. artikulua. — Justifikatzeko era

Diru-laguntza justifikatzeko, dokumentazio hau aurkeztu beharko da Enplegua, Gizarte Inklusioa eta Berdintasuna Sustatzeko Sailaren bulego birtualaren bidez, behean adierazten diren epeetan:

- 1. 2018ko irailean, proiektuaren gauzatzeari buruzko bitarteko txosten bat aurkeztuko da, 2018ko ekainaren 30ean zein egoeratan dagoen azaltzen duena; txostenean, alderdi hauek jasoko dira:
 - a) Proiektuan jasotako ekintzen azalpen-memoria, non zehaztuko diren ekintza bakoitzaren edukia eta gauzatze-maila.

Ekintza horietako bakoitzerako, parte-hartzaileei buruzko datuak aurkeztuko dira; datuok sexuaren, adinaren (30 urtera arte, 31-45 urte bitartean eta 45 urte tik gora) eta gizarte eta laneko egoeraren (langabezian edo enplegu hobe baten bila) arabera bereiziko dira.
 - b) Justifikazio-memoria ekonomikoa, hauek jasoko dituena:
 - 1) Proiektuari egotzitako sarrera-gastuen egoera-orria, 2018ko lehen sei hilabetekoari dagokiona.
 - 2) Diruz lagundu den jardueraren gastuen zerrenda sailkatua.
 - 3) Sarreraren egoera-orriaren zerrenda zehatza: diruz lagundutako jarduera finantzatu duten beste diru-laguntzak, laguntzak, sarrerak eta baliabideak, finantzaketa propioa barne; adieraziko da zenbatekoak diren eta nondik datozen.



2. 2019ko otsailaren 28a baino lehenago, justifikazio-kontua aurkeztu beharko da, gastuen frogagiriekin batera; diru-laguntzei buruzko foru araudiaren 57. artikuluan arautzen da justifikazio-kontu hori (martxoaren 23ko 34/2010 Foru Dekretuaren bidez onartu zen araudia). Horretarako, dokumentazio hau aurkeztu beharko da:

- a) Diru-laguntza emateko ezarritako baldintzak betetzen direla justifikatzeko jardueraren memoria, proiektuan jasotako jardueretako bakoitza azaltzen duena; ekintza bakoitzean alderdi hauek adieraziko dira: ekintzak, garapena eta gauzatzea, helburuen betetze maila eta eskualdean duen eragin sozioekonomikoa.

Ekintza horietako bakoitzerako, parte-hartzaileei buruzko datuak aurkeztuko dira; datuok sexuaren, adinaren eta gizarte eta laneko egoeraren arabera bereiziko dira.

- b) 2018ko urtarrilaren 1etik abenduaren 31ra arte eginiko jardueren kostua justifikatzen duen memoria ekonomikoa, alderdi hauek jasotzen dituena:

- 1) Diruz lagundutako jarduerari egotzitako gastu eta sarreraren egoera-orria.

- 2) Diruz lagundu den jardueraren gastuen zerrenda sailkatua.

Enplegua, Gizarte Inklusioa eta Berdintasuna Sustatzeko Sailak ezarritako ereduaren arabera aurkeztuko da justifikazioa (Sailaren web orrialdean egongo da ereduak), excel fitxategi-formatuan; karpeta bakar batean sartuko da, eta euskarri informatikoan aurkeztuko da.

- 3) Diruz lagundutako ekintzan parte hartzen duten langileei buruzko ziurtagiria, non adierazten den proiektuan zenbat ordutan jarduten duten, zenbateko kostua dakarren ordu bakoitzak eta zer irizpide erabili dituzten horretarako.

- 4) Diruz lagundutako jardueran parte hartzen duten langileen nominak eta TC2ak (langileen nominen zerrenda), ekintzan jardun duen hilei dagozkienak. Enplegu eta tokiko garapenerako zentroek ez badute dagozkien toki-erakundeetatik eta organismo autonomoetatik bereizitako nortasun juridiko propiorik, nominak eta TC2ak aurkeztu barik udaleko kontu-hartzaileak emandako ziurtagiri bat aurkeztu ahal izango da, non egiaztatuko den ezarritako epean oro har zer ordainketa egin dituen udal korporazioak. Ziurtagiri horretan, proiektuan parte hartzen duten langileen kostuak banakatuko dira.

- 5) Sarreraren egoera-orriaren zerrenda zehatza: diruz lagundutako jarduera finantzatu duten beste diru-laguntzak, laguntzak, sarrerak eta baliabideak, finantzaketa propioa barne; adieraziko da zenbatekoak diren eta nondik datozen.

- 6) Hala badagokio, aplikatu gabeko soberakinen itzulketaren ordainketa-gutuna.

9. artikulua. — Diruz lagundu daitekeen ekintza egiteko epea

Diru-laguntza jasotzen duten ekintzak 2018ko urtarrilaren 1etik 2018ko abenduaren 31 bitartean egin beharko dira.

10. artikulua. — Eskabideak aurkezteko modua, tokia eta epea

Laguntza hauei heldu nahi dietenek eskabide egokia aurkeztu beharko dute, oso-osorik behar bezala beteta, eta 11. artikuluan zehaztutako agiri guztiak erantsita, nahitaez Interneten bidez Enplegua, Gizarte Inklusioa eta Berdintasuna Sustatzeko Sailaren bulego birtuala erabilita, Administrazio Publikoen Administrazio Prozedura Erkidearen urriaren 1eko 39/2015 Legearen 16. artikuluekin bat etorruta. Bizkaiko Foru Aldundiaren www.bizkaia.eus web-orrian, Izapideak- Enplegua, Gizarte Inklusioa eta Berdintasuna Sustatzeko bulego birtuala atalean.

Bulego birtuala erabiltzeko, sistemak sinadura elektronikoa edo BizkaiBai txartela eskatuko ditu. Hura eskatzeko: Laguntza - Erregistroa eta Herritarrenganako Laguntza Bulegoan (Diputazio kalea, 7, beheko solairua, Foru Liburutegiaren kristalezko eraikina, Aldundiko Jauregiaren atzealdean, 48008 Bilbo Sarrera: Metroko Moyua geralekua,



Diputazio kaleko irteera) edo Durangoko Hiritarrentzako Arretako eskualdeko Bulegoan (Askatasuna etorbidea, 12. 48200 Durango).

Eskabide-orrira jo aurretik, sistemak Enplegua, Gizarte Inklusioa eta Berdintasuna Sustatzeko Saileko Erakundearen Erregistroan inskripzioa egiteko beharrezkoak diren datuak eskatuko dizkizu. Inskripzio hori diru-laguntza eskatu aurretik egin behar da eta nahitaezkoa da.

Erregistro horren barruko datuetan edo eskabidean egiaztatutakoetan aldaketaren bat eginez gero Enplegua, Gizarte Inklusioa eta Berdintasuna Sustatzeko Sailari jakinarazi behar zaio, haren bulego birtualaren bidez.

Eskabideak aurkezteko epea 2018ko martxoaren 12an hasiko da, 8:00etan, eta 2018ko martxoaren 28an bukatuko da, 13:30ean.

Eskabideak aurkeztuz, eskatzaileak baimena ematen dio diru-laguntza ematen duen organoari zuzenean lor ditzan foru dekretu honen 15. artikuluko azkenaurreko atalean ageri diren inguruabarren egiaztagiria. Horretarako, dagozkion ziurtagiri telematikoak baliatu ahal izango dira, 34/2010 Foru Dekretuaren 17. artikuluan xedatutakoarekin bat etorrira.

11. artikulua. — Nahitaezko dokumentazioa

1. Laguntzei heldu nahi dietenek eskabidea aurkeztu beharko dute, diru-laguntza eskatzen duen entitatearen ordezkariak behar bezala beteta, nahitaezko agiri hauekin batera:

- a) Banku-helbideratzearen fitxa: Fitxan adierazitako kontu-zenbakiak eskabide orrian jarritako bera izan behar du.
- b) Plantillaren ziurtagiria, udaleko kontu-hartzaileak emana, baldin Behargintzak enplegu eta tokiko garapenerako zentroek ez badute dagozkien toki-erakundee-tatik bereizitako nortasun juridiko propiorik, edo erakundearen ordezkariak duen pertsona emana, baldin eta merkataritzako enpresa edo irabazteko asmorik gabeko elkarte gisa eraturitako enplegu eta tokiko garapenerako zentroak badira. Ziurtagirian, Behargintza zentroari atxikitako pertsonen zerrenda, lanpostua eta kontratu-mota adierazi beharko dira.
- c) Txostena, gutxienez ere alderdi hauek jasotzen dituena:
 - 1) Proiektuaren memoria, alderdi hauek zehazten dituena:
 - Lortu nahi diren helburuak.
 - Egin beharreko jarduketak; atal honetan, zehatz-mehatz azalduko da jarduketa bakoitza, eta adieraziko da zein epetan egingo den eta nor arduratuko den egiteaz.
 - Proiektuan parte hartuko duten pertsonen zerrenda; adieraziko da pertsona bakoitzak zenbat ordu emango dituen eta orduko zenbateko kostua dakarren.
 - Eta, era berean, jarduketa bakoitzeko aurrez ikusitako pertsonal-gastuak, aurrez ikusitako sarrerekin batera.
 - 2) Proposatutako ekintzaren egokitasuna justifikatzeko arrazoiak.
 - 3) Behargintzaren jardun-eremua diren udalerrietan proposatutako proiektuaren lan- eta gizarte-eraginaren azterketa.

2. Laguntza hauek eman diezazkioten, eskatzaileak nahitaez egiaztatu beharko du, laguntzak emateko ebazpen-proposamena eman baino lehen, egunean dituela zerga-betebeharrak nahiz zuzenbide publikoko gainerakoak eta, hala badagokio, Gizarte Segurantzarekikoak, eta ez duela zorrik Bizkaiko Foru Aldundiko Ogasun eta Finantza Sailak kudeatzen dituen enbargo ordaingabeak direla eta. Behar bezala betetako eskabidea aurkeztuz, besterik gabe, entitate eskatzaileak baimena emango dio Enplegua, Gizarte Inklusioa eta Berdintasuna Sustatzeko Sailari, beraren izenean bil ditzan zerga-betebeharrak eta Gizarte Segurantzarekikoak egunean dituela egiaztatzen duten ziurtagiriak.



3. Nolanahi ere, Enplegua, Gizarte Inklusioa eta Berdintasuna Sustatzeko Sailak nahi dituen agiri eta informazio osagarri guztiak eskatu ahalko dizkie entitate eskatzaileei, entitateok aurkeztu duten eskabidea egoki ebaluatu eta ebaztearren.

12. artikulua.— *Prozedura hastea eta izapideak egitea*

Diru-laguntzetarako eskabideak ez badaude osorik beteta edo erantsita ez badauzkate beharrezko diren agiri guztiak, edo laguntzaren xedea behar adina zehazten ez bada, enpresa edo pertsona eskatzaileari errekerimendua bidaliko zaio, jakinarazpena jasoz geroko hamar eguneko epearen barruan akatsa zuzen dezan edo 11. artikuluan aipatu diren nahitaezko agiriak aurkez ditzan; halaber, adieraziko zaio ezen, hala egin ezean, eskaeran atzera egindakotzat joko dela, 39/2015 Legearen 68. artikuluan ezarritakoaren arabera. Horretarako, ebazpen bat eman beharko da aurretik, aipatutako legearen 21. artikuluan ezarritakoaren arabera idatzia.

Enplegua, Gizarte Inklusioa eta Berdintasuna Sustatzeko Sailak izapidetuko ditu eskabideak.

13. artikulua.— *Diru-laguntzen adjudikazioa: baldintzak eta araubidea*

Foru dekretu honetan ezarritako baldintzen arabera emango dira diru-laguntzak eta laguntzak, betiere 6. artikuluan laguntzak emateko ezarritako prozeduraren arabera.

Foru dekretu honen, 5/2005 Foru Arauaren 20. artikulua 1. zenbakiaren azken paragrafoan ezarritakoa aplikatuko da, eta xedapen gehigarri bakarrean ezarritako gehieneko zenbateko osoa hainbanatuko da diru-laguntzaren erakunde onuradunen artean.

Hainbanaketa erakunde bakoitzak, 6. Artikuluan ezarritako irizpideak kontuan hartuta, lortutako balorazioaren emaitzaren arabera aplikatuko da, entitate guztiek lortutako puntuen baturaren puntuen arabera, proportzionalki. Muga izango da eskatutako zenbatekoa eta 4. artikuluan ezarritako 50.000 euroko gehienekoa.

14. artikulua.— *Diru-laguntzak ematea eta errekurtsioak jartzea*

1. Eskabideak ebazpen bakarraren bidez ebatziko dira. 5/2005 Foru Arauaren 23. artikuluaekin bat etorrita, ebazpen horretan diru-laguntzaren onuradunen zerranda jasoko da, honako hauek zehaztuta: gainerako diru-laguntzen ezespeneak edo eman gabeko diru-laguntzak —atzera egiteagatik, eskubideari uko egiteagatik nahiz geroago sortutako ezintasunagatik—.

2. Onuradun bati diru-laguntza eman dion foru agindua jakinarazita, hamar (10) eguneko epea izango da hura onartzeko, edo ukatzeko, eta epe horretan ez bada beren-beregi ezer adierazten, isiltasunez onartutzat joko da.

3. Foru dekretu honen babesean aurkeztutako eskabideak ebazteko gehieneko epea bukatuko da, eskabideak aurkezteko epea amaitzen denetik 6 hilabeteko epea igarotakoan.

Aurkeztutako eskabide guztien beren beregiko ebazpena emateko eskumena duen organoak ebazpena eman behar badu ere, ebazpena eta jakinarazpena emateko epea iraungi, eta beren beregiko ebazpena eman ez badu, eskabidea administrazio isilbidez ezetsi egin duela ulertuko da, ondoren ere 39/2015 Legearen 21 eta 24. artikuluetan xedatutakoaren arabera beren-beregi ebatzi badaiteke ere.

4. Ebazpen honek amaiera ematen dio administrazio-bideari, eta haren aurka aukerako berraztertze errekurtsioa aurkez dakioke Ekonomi eta Lurralde Garapena Sustatzeko Saileko titularrari, hilabete bateko (1) epean, jakinarazpen hau jaso eta biharamunetik hasita, 39/2015 Legean ezarritakoaren arabera.

Halaber, Administrazioarekiko auzi-errekurtsioa jar daiteke, Administrazioarekiko Auzietarako dagokion Epaitegian, bi hilabeteko epean, jakinarazpena jaso eta biharamunetik aurrera, Administrazioarekiko Auzien Jurisdikzioa arautzen duen uztailaren 13ko 29/1998 Legean ezarritako eran. Ezingo dira errekurtsio biak aldi berean jarri.

**15. artikulua.— Entitate onuradunaren betebeharrak**

Foru dekretu honetan diru-laguntzen onuradunentzat ezartzen diren betebeharrez gainera, laguntzak jasotzen dituzten entitate onuradunek bete beharko dituzte 5/2005 Foru Arauaren 12., 13., 31.5 eta 41. artikuluetan ezarritakoak ere. Besteak beste, honako hauek:

- a) Diru-laguntza ematearen funtsa den jarduera egitea edo hartarako jokabidea hartzea.
- b) Enplegua, Gizarte Inklusioa eta Berdintasuna Sustatzeko Sailari, hala denean, jarduera gauzatu dela edo hori lortzeko asmoz jardun dela frogatzea, baita diru-laguntza ematea edo hartaz gozatzea ekarri duten betebeharrak eta baldintzak bete direla ere.
- c) Enplegua, Gizarte Inklusioa eta Berdintasuna Sustatzeko Saila, hala badagokio, egiten dituen egiaztapen-jarduketan mendean jartzea, bai eta ematen diren diru-laguntzen eta laguntzen arloan Ogasun eta Finantza Sailari dagokion finantzen kontrolerako jarduketan eta Herri Kontuen Euskal Auzitegiaren fiskalizazio-prozeduren mendean jartzea ere.
- d) Enplegua, Gizarte Inklusioa eta Berdintasuna Sustatzeko Saila Sailari jakinaraztea helburu bererako diru-laguntzarik edo bestelako laguntzarik jaso bada nazio-ko edo nazioarteko beste edozein administraziotatik edo erakunde publikotatik. Baita eskabidean adierazitako datuei buruzko edozein aldaketa edo inguruabarraren berri ematea ere, baldin eta aldaketa edo inguruabar horrek diru-laguntza jasotzean edo diru-laguntzaren xedea den jardueran edo helburuan funtsezko eragina izan badezake.
- e) Jarduerak finantzatzeko, diru-laguntzaz gain norberaren funtsak edo beste diru-laguntza zein baliabide batzuk erabili badira, justifikazio-agirian beste funts horien zenbatekoa, jatorria eta funts horien diruz lagundutako jarduerari egindako aplikazioa ere egiaztatu beharko dira.
- f) Sortuko diren agiri eta euskarrietan ez erabiltzea hizkuntza eta irudi sexistarik.
- g) Datu pertsonalak eskatzerakoan, datuen babesari buruzko arautegiaren beharri-zanen arabera jokatzeko.
- h) Kontabilitateko liburuak, erregistroak eta gainerako agiri guztiak edukitzea (kasu bakoitzean onuradunari aplikatu behar zaizkion merkataritzako eta arloko legerietan ezarritakoaren arabera auditatuak), eta diru-laguntza hauen oinarrietan eskatzen diren kontabilitateko egoera-orri eta erregistro espezifiko guztiak edukitzea, egiaztapen eta kontrol ahalmenen erabilera egokia bermatzeko.
- i) Jasotako funtsen erabilera justifikatzen duten agiriak gordetzea (baita dokumentu elektronikoak ere), ekonomia eta fiskalizazio kontrolerako organoek —Europako Gizarte Funtsekoek barne— egiaztapen eta kontrol ekintzetarako erabil ditzaketan neurrian, arlo horretan aplikagarria den araudiak ezartzen duen epean. Merkataritza Kodearen 30. artikuluan xedatutakoaren arabera, liburuetan azken idazpena egina eta 6 urteko epean gorde beharko dira agiriok.
- j) Eskabidea aurkeztuta, eskatzaileak baimena ematen dio Enplegua, Gizarte Inklusioa eta Berdintasuna Sustatzeko Sailari haren izenean bide telematikoen bidez ziurtagiri batzuk zuzenean lor ditzan, jakiteko zerga-betebeharrak eta Gizarte Segurantzarekikoak egunean ordainduta dauzkan. Egunean ez badago, ezin izango da diru-laguntza ordaindu, beraz, ordaintzeko diru-laguntzaren zenbatekoa kobratzeko eskubidea galduko du, eta 22. artikuluan xedatutako ez-betetzeagatik prozedura hasiko litzateke.
- k) Enplegu Zerbitzuari jakinaraztea entitate adjudikaziodunaren sozietate-izenari dagokion edozein aldaketa, bai eta haren forma juridikoari dagokiona edo bazkideen aldaketari dagokiona eta abar ere. Baita eskabidean adierazitako datuei buruzko edozein aldaketa edo inguruabarraren berri ematea ere, baldin eta aldaketa edo inguruabar horrek diru-laguntza jasotzean edo diru-laguntzaren xedea den jardueran edo helburuan funtsezko eragina izan badezake.

**16. artikulua.— Programaren jarraipena. Ikuskapena eta kontrola**

Entitate onuradunek 8. artikuluan ezartzen diren epeetan bidali beharko dute eskatutako dokumentazioa Enplegua, Gizarte Inklusioa eta berdintasuna Sustatzeko Sailera.

Bestalde, laguntza ematean kontuan hartutako baldintzak funtsean aldatzen dituzten gertakari guztien berri eman behar diote Enplegua, Gizarte Inklusioa eta Berdintasuna Sustatzeko Sailari, eta harekin batera lan egin beharko dute egiaztapen, jarraipen eta kontrolako prozeduretan.

Enplegua, Gizarte Inklusioa eta Berdintasuna Sustatzeko Sailak ekimen honek lortu nahi dituen helburuak lortuko direla bermatzeko beharrezkoak diren ikuskapen eta kontrolako ekintza guztiak egin ahal izango ditu.

17. artikulua.— Emandako diru-laguntzen publizitatea

1. Ematen diren diru-laguntzen publizitateari dagokionez, Enplegua, Gizarte Inklusioa eta Berdintasuna Sustatzeko foru diputatuak foru agindu bat emango du Bizkaiko Aldizkari Ofizialean argitaratzeko zer diru-laguntza ematen diren, eta hor adieraziko da, batetik, aurrekontuko zer programari eta kredituri egozten zaizkion, eta, bestetik, adjudikaziodun gertatu diren entitateen eta bakoitzari emaniko diru-kopuruen zerrenda bat.

2. Onuradunek behar bezala jakinarazi behar dute dekretu honen babesean diruz lagundutako jarduerak edo jarduerak finantzaketa publikoa jaso dutela.

Enplegu eta Toki Garapenerako Zentroek, bakoitzak duen izendapena alde batera utzita, «Centro de empleo y desarrollo local, Behargintza»/«Behargintza enplegu eta tokiko garapenerako zentroa» izena erabiliko dute dekretu honen garapenean.

Hain zuzen ere, erakunde adjudikaziodunari eskatzen zaio jardueri buruzko publizitatean txerta ditzala Bizkaiko Foru Aldundiaren, Behargintzaren eta bere logotipoak.

Era berean, logotipook agertu beharko dute inprimatutako materialetan, baliabide elektronikoetan edo ikus-entzunezkoetan, baita komunikabideetan egindako aipameneetan ere.

Aurreko lerroaldeetan aipatu diren zabalkundeko neurriak beteko ez balira, onuradunari agindeia egingo litzaioke, ezarritako zabalkundeko neurriak har ditzan 15 eguneko epea amaitu baino lehen, eta ohartaraziko zaio ez-betetze horrek 23. artikuluan xedatutako itzulketarako prozedura hastea ekarriko lukeela.

18. artikulua.— Diru-laguntza beste diru-laguntza batzuekin batera lortzea

1. Foru dekretu honetan ezartzen diren laguntzekin batera, xede bererako, nazioko, Europar Batasuneko edo nazioarteko edozein administrazioen edo erakunde publiko nahiz pribaturen beste diru-laguntza, laguntza, sarrera edo baliabide batzuk jaso ahal izango dira.

Diru-laguntza guztien zenbatekoak ezin izango du inola ere gainditu lagundutako jardueraren kostua, ez berak bakarrik, ezta beste diru-laguntza, laguntza, sarrera edo baliabide batzuekin batera ere.

2. Entitate onuradunek nahitaez jakinarazi behar diote diru-laguntza eman dien organoari beste diru-laguntza, laguntza, sarrera edo baliabide batzuk lortu dituztela hark diruz lagundu dituen jarduerak finantzatzeko.

Halako laguntza, sarrera edo baliabideak jaso behar direla jakin bezain laster egin behar da jakinarazpen hori, eta betiere jasotako funtsei emandako aplikazioa justifikatu baino lehen.

Jakinarazteko eginbehar hori ez betetzeak dagokion zehapena ekarriko du, 5/2005 Foru Arauaren arabera.

19. artikulua.— Diru-laguntzaren aldaketa

Diru-laguntzak emateko orduan kontuan hartutako baldintzak aldatzeak diru-laguntzen emakidari buruzko ebazpena aldatzea ekar dezake, baldin eta diru-laguntzaren helburua eta xedea bete direla uste bada. Halakoetan, dekretu honetan ezarritako irizpi-deak eta mugak aplikatuko dira.

**20. artikulua.— Diru-laguntza gutxitzea**

Diruz lagundutako jarduerak egin direla justifikatzeko ezarritako epeak igaro ondoren, jarduera guztiak aurrez ikusi bezala burutu direla egiaztatu eta justifikatu ez bada, betiere laguntzen helburua eta xedea bete direla uste bada, diru-laguntzaren zenbatekoa doitzeari ekingo zaio, benetan justifikatutako kostuen arabera. Horretarako, proportzionaltasun irizpidea erabiliko da, baita diru-laguntza emateko orduan ezarritako irizpideak eta mugak ere.

21. artikulua.— Baldintzak ez betetzea

1. Honako kasu hauetan, baldintzak ez direla bete ulertuko da: laguntzak jaso dituzten onuradunek dekretu honetan, diru-laguntza emateko ebazpenean edo aplikatu beharreko gainerako arautegian ezarritako baldintzetako bat betetzen ez dutenean, bai eta 5/2005 Foru Arauaren 33. artikuluan ezartzen diren kasuetan ere.

2. Ez-betetzea honako hauen arabera mailaka daiteke:

- a) Baldintzetako bat edo batzuk ez betetzeak edo epearen barruan jardueraren zati bat bakarrik burutzeak diru-laguntzaren zati bat bakarrik ordaintzea ekarriko du, edo, hala badagokio, diru-laguntzaren zati bat itzuli behar izatea. Itzulketa hori kalkulatzeko, jarduera osotik hartutako zatiaren proportzio bera erabiliko da.
- b) Diru-laguntza kobratu eta gero, egindako gastu guztiak edo zati bat ordaindu gabe edukitzeak diru-laguntza itzuli behar izatea ekarriko du. Kasu horretan, diru-laguntza jaso dezaketen gastu egotzi guztietatik ordaindu gabeko gastuek osatzen duten proportzioaren arabera izango da diru-laguntzaren itzulketa.
- c) Diru-laguntza bat eman denean gastu-aurrekontu bat erreferentzia legez hartuta, baina egotzi eta justifikatutako gastua aurrekontuan ezarritakoa baino txikiagoa bada.

22. artikulua.— Aldaketen, gutxitzeen eta ez-betetzeen prozedura

Dagokion administrazio-unitateak tramitatuko du prozedura, eta Enplegua, Gizarte Inklusioa eta Berdintasuna Sustatzeko Sailaren foru diputatuak ebatziko du, eta, hala badagokio, adieraziko du erakunde onuradunek eman zitzaieen eta jaso zuten kopurua guztiz edo partez itzuli behar duten.

Diru-laguntzei buruzko administrazio arau-hausteei zein zehapen-prozedurei dagokienez, Diru-laguntzei buruzko 5/2005 Foru Arauaren IV. tituluan xedatutakoa izango da aginduzkoa.

Horrez gainera, ez-betetzea gertatu dela adierazten duen foru aginduan, zehapen-prozedura abiarazteko agindua eman daiteke, hala badagokio.

23. artikulua.— Itzuli beharreko kredituak

1. Bizkaiko Foru Aldundiaren 34/2010 Foru Dekretuaren 80. artikulua arabera, diru-laguntza itzultzeko prozedura abiarazten duen erabakian prozedura hori zerk abiarazi duen, zer eginbide bete ez den eta diru-laguntzaren zer parteri eragiten dion adierazi behar da. Onuradunari erabakiaren berri jakinarazi, eta hamabost eguneko epea eman go zaio egokitze jotzen dituen agiriak alegatzeko edo aurkezteko.

Diru-laguntza bat osorik edo haren zati bat itzultzen bada (dela aldaketa bategatik, dela gutxitzeagatik edo dela baldintzak ez-betetzearen adierazpen bategatik), diru-laguntza ordaindu zenetik aurrera aplikatu behar diren berandutze-interesak ordaindu beharko dira, 5/2005 Foru Arauaren 34. artikuluan xedatutakoaren arabera.

2. Onuradunak berak Administrazioaren aurretiazko errekerimendurik gabe egindakoa da borondatezko itzulketa.

Horretarako, beharrezkoa izango da aurretiaz jakinarazpena egitea Enplegua, Gizarte Inklusioa eta Berdintasuna Sustatzeko Sailari.



Borondatezko itzulketa egiten denean, Administrazioak dagozkion berandutze-interesak kalkulatuko ditu, 5/2005 Foru Arauaren 34. artikuluan ezarritakoaren arabera eta onuradunak behin betiko itzulketa benetan egin duen unea arte.

Erakunde onuradunak bere borondatez itzuli nahi badu diru-laguntza, ordainketa-gutuna erabili beharko du, Bizkaiko Foru Aldundiaren eredu ofizialaren arabera.

Gero, Bizkaiko Foru Aldundiko Ogasun eta Finantza Sailak dirua biltzeko prozedurari ekingo dio, eta norberaren borondatez ordaintzeko epea hasiko da.

24. artikulua.— *Araudi orokorra*

1. Dekretu honetan aipatzen diren diru-laguntzak honako hauek arautuko dituzte: dekretu hau bera, eta laguntzak emateko foru aginduak, 5/2005 Foru Arauak eta hura garatzen duen erregelamendua (34/2010 Foru Dekretuaren bidez onetsia) eta Administrazio Zuzenbideko gainontzeko arauak. Halakorik ezean, Zuzenbide Pribatuko arauak aplikatuko dira.

2. Izaera Pertsonaleko Datuak Babesteari buruzko abenduaren 13ko 15/1999 Lege Organikoan ezarritakoaren arabera, interesdunak ematen dituen datuak dena delako prozeduran edo jarduketan aurrez ikusitako xedeetarako soil-soilik erabiliko dira.

Datu horiek inola ere ez dira erabiliko, ez beste bati lagako, estatistika- edo ikerketa-ondorioetarako, interesdunak argi eta garbi ados dagoela adierazi ezean edo Izaera Pertsonaleko Datuak Babesteari buruzko abenduaren 13ko 15/1999 Lege Organikoaren 6.2. eta 11.2. artikuluetan ezarritako kasuetako bat gertatu ezean. 15/1999.

Lege Organikoan xedatutakoaren arabera, datuak lagatzen dituenak noiznahi baliarazi ahal izango ditu datuok eskuratzeko, zuzentzeko, ezerezteko eta haien aurka egiteko eskubideak, araudiaren arabera ezartzen den eran.

Halaber, interesduneko hogeita hamar eguneko epea izango dute datuen tratamenduari buruzko adostasunean atzera egiteko, tratamenduari buruzko ezetza adierazteko eta, era horretarako adierazpenik egiten ez badute, beren datu pertsonalen tratamendurako baimena ematen dutela ulertuko da (1720/2007 Errege Dekretuaren 14.2 art.).

Bestetik, fitxategiaren arduraduna eta datuen tratamenduaren barruko edozein fase-tan esku-hartzen duen edozein pertsonak datu horien edukiaren gaineko sekretu profesionala gorde beharko du.

3. Dekretu honetan administrazio prozedurari buruz ezarrita ez dagoenerako, Herri Administrazioen Administrazio Prozedura Erkidearen urriaren 1eko 39/2015 Legea, Sektore Publikoaren Araubide Juridikoaren urriaren 1eko 40/2015 Legea eta bere izaeragatik aplikatzekoa izan daitekeen beste edozein xedapen izango da aplikatzekoa.

4. Dekretu honetan aurrez ikusitako laguntzak ez dira estatu-laguntzak Europar Batasunaren Funtzionamenduari buruzko Tratatuaren 107. artikuluko 1. zenbakian ezarritakoaren arabera; izan ere, enpresari ez dakarzkio mozkinik eta ez diete ekoizpen edo enpresa batzuei mesederik egiten beste batzuen kaltetan. Beraz, salbuetsita daude tratatu horren 108.3 artikuluan ezarritako jakinarazpen-prozeduratik.

25. artikulua.— *Zehapen-prozedura*

Erakunde onuradunak 5/2005 Foru Arauaren IV. tituluari, «Diru-laguntzei buruzko arau-hauste eta zehapen administratiboak», ezarrita dauden arau-hausteetako bat egiten badu, zigor-espeditentea egin ondoren zigorra ezarriko zaio, 39/2015 Legean eta Euskal Autonomia Erkidegoko Herri Administrazioen zigortzeko ahalmenari buruzko otsailaren 20ko 2/1998 Legean ezarritakoaren arabera.

XEDAPEN GEHIGARRIAK

Bakarra.— *Aurrekontuko diru-izendapenak*

1. Dekretu honen arabera eman daitezkeen laguntzak eta onurak ondoren aipatzen diren aurrekontuko partiden eta zuzkiduren kontura ordainduko dira. Partida eta zuzkidura horiek aurrekontuei buruzko indarreko araudiaren arabera aldatu ahal izango dira.



- Partida: 0904/G/241116/43299 2007/0518.
- 2018. urteko gastua. 442.000,00 euro.
- Partida: 0904/G/241116/44300 2007/0518.
- 2018. urteko gastua. 234.000 euro.
- Partida: 0904/G/241116/45100 2007/0518.
- 2018. urteko gastua. 49.000,00 euro.

2. Diru-laguntza hauetan, 725.000,00 euro eman ahal izango dira, gehienez ere, gutxi gorabehera. Kopuru hori, gehieneko zenbatekoei doakiela, 34/2010 Foru Dekretuaren 41. artikuluan xedatutakoaren arabera alda daiteke.

Halaber, aurrekontuetako kredituen arteko banaketa gutxi gorabeherakoa da; beraz, aurkeztutako eskabide kopuruaren arabera eta kontuan izanik izaera askotako erakunde onuradunak egon daitezkeela, foru dekretu honetan ezarritako aurrekontuko izendapen horiek foru dekretu honetan adierazitako partida ezberdinen artean banatu ahal izango dira, foru agindu bidez, betiere ezarritako muga orokorra gainditu gabe.

AZKEN XEDAPENAK

Lehenengoa.— Arauen garapenerako gaikuntza

Ahalmena ematen zaio Enplegua, Gizarte Inklusioa eta Berdintasuna Sustatzeko Sailaren foru diputatuari, foru dekretu hau osatu edo garatzeko beharrezkotzat jotzen dituen xedapen guztiak eman ditzan.

Bigarrena.— Indarrean jartzea

Foru dekretu hau Bizkaiko Aldizkari Ofizialean argitaratu eta biharamunean jarriko da indarrean.

Foru dekretu hau 2018. eta 2019. urteetan egongo da indarrean.

Bilbon, 2018ko martxoaren 6an.

Enplegua, Gizarte Inklusioa
eta Berdintasuna, Sustatzeko foru diputatua
TERESA LAESPADA MARTÍNEZ

Ahaldun Nagusia
UNAI REMENTERIA MAIZ